

四
六
叢
話

四六叢話卷三十三

烏程 孫梅 輯

作家六 宋四六諸家

徐鉉

字鼎臣揚州廣陵人十歲能屬文仕南唐試知制誥
太平興國初直學士院從征太原軍中書詔填委鉉
援筆無滯辭理精當時論能之卒年七十六 宋史

欽定四庫全書
徐鉉明目錄騎省集三十卷其壻吳淑編前
二十卷仕南唐時所作後十卷入宋後作也鉉才思
敏捷下筆卽成故其詩流易有餘深警不足其文亦

沿溯燕許不能嗣韓柳之音然在五季之中則迥然孤秀矣

鉉初至京師見御毛褐者輒哂之邠苦寒竟以冷氣入腹而卒鉉幼能屬文尤精小學爲文未嘗沈思自云速則意思壯敏緩則體勢疎慢云集有陳彭年序郡齋讀書志

徐常侍集三十卷所撰李煜墓銘婉微有體文鑑取之直齋書錄解題

王禹偁

字元之鉅野人九歲能文太平興國八年登進士歷

右拾遺拜左司諫貶商州團練副使累遷翰林學士
坐謗訕知滁州真宗卽位召知制誥出知黃州卒

宋史

欽定四庫全書簡明目錄小畜集三十卷外集七卷禹偁
嘗以易自箴得乾之小畜故以名集明以來但有寫
本近有平陽趙氏刻本外集爲其曾孫汾所編久佚
不傳此本爲河間紀氏閎微草堂所藏僅存第七卷
至十三卷其詩文始全變五季雕繪之習然亦不爲
柳開之奇僻

元之詞學敏贍獨步一時鋒銳氣厲極談世事臧否

人物以直道自任故屢被擯斥喜稱獎後進當世名士多出於門下集自爲序

郡齋讀書志

又有承明集十卷奏議集三卷後集詩三卷未見

宋案

史藝文志無奏議集後集詩而有別集十六卷

直齋書錄解題

楊億

字大年建州浦城人七歲能屬文十一太宗聞其名送闕下對試詩賦授祕書省正字淳化中賜進士第天禧二年拜工部侍郎四年爲翰林學士卒年五十七

宋史

欽定四庫全書簡明目錄武夷新集二十卷億集本一百

九十四卷至南宋惟存此集及別集今別集又佚惟此集存凡詩五卷文十五卷大致宗法李商隱而精警不及要其春容典雅不失爲治世之音

楊文公刀筆集十卷大年天性穎悟自幼迄老不離翰墨爲文敏速對客談笑揮毫無滯博聞強記於歷代典章制度尤所該通時多取正景祐中王晦叔上其爲寇相請皇太子親政疏草仁宗嘉歎特贈禮部尙書謚曰文刀筆集有陳詒序凡三百六十三首

郡齋讀書志

武夷集二十卷景德丁未公所自編序於前曰目之

武夷蓋山林之士不忘維桑之情雕篆之文竊懷敝帚之愛命題之意蓋以是也集凡五百七十五篇自唐大中後文氣衰濫國朝稍革其弊至億乃振起風采與古之作者方駕矣

同上

武夷集二十卷別集十二卷案本傳所著枯蒼武夷潁陰韓城退居汝陽蓬山冠鰲等集及內外制刀筆共一百九十四卷館閣書目猶有一百四十六卷今所有者惟此而已武夷新集者億初入翰苑當景德丙午明年條次十年詩筆而序之別集者祥符五年避讒佯狂歸陽翟時所作也君可思賦居其首

直齋

書錄解題

劉筠

字子儀大名人舉進士以大理評事爲祕閣校理是時四方獻符瑞天子方興禮文之事筠數上賦頌進翰林學士承旨兼龍圖直學士

宋史

劉中山刀筆三卷泚川集四卷子儀爲人不苟合學問閱博文章以理爲宗辭尙緻密尤工篇詠能俾揣情狀音調淒麗自景德已來與楊億以文篇齊名號爲楊劉天下宗之刀筆集并泚川集有黃鑑序

郡齋

讀書志

中山刀筆集三卷皆四六應用之文別有冊府應言
集十卷榮遇集十二卷表奏六卷淝川集四卷見館
閣書目 直齋書錄解題

張詠

字復之濮州鄆城人太平興國五年進士真宗初入
爲御史中丞知杭州益州謚忠定 宋史

欽定四庫全書簡明目錄乖崖集十二卷附錄一卷其集
宋代有二本此本卽郭森卿所刻但佚其年譜一卷
耳詠以不合時宜故自號乖崖其文乃疏通平易不
爲嶄絕之語其詩亦列名西崑集中

張乖崖集十卷少好擊劍兼通術數爲文尙氣不事雕飾自號乖崖公知益州恩威並著至今人畏愛之錢易所撰墓誌李昉所纂語錄附於後

郡齋讀書志

錢希白爲基誌韓魏公爲神道碑近時郭森卿宰崇陽刻此集舊本十卷今增廣并語錄爲十一卷

直齋

書錄解題

夏竦

字子喬江州德安人以父死事補官仁宗朝同中書門下平章事封英國公贈中書令諡文莊

宋史

欽定四庫全書簡明目錄文莊集三十六卷原本久佚今

從永樂大典錄出竦雖姦黨然學問則殊賅博其文章詞藻贍逸尙有燕許遺軌集中所載多廟堂典冊之文蓋所長在是體也錄唐詩者不廢沈佺期宋之問則竦是集亦不妨就文論文矣

夏文莊集一百卷子喬天資好學自經史百氏陰陽律歷之書無所不通善爲文章尤長偶儷之語朝廷大典策屢以屬之其集夏伯孫編次有宋次道序

郡齋讀志

竦父死王事身中賢科工爲文詞復多材術而不自愛重甘心姦邪聲伎之盛冠於承平夫婦反目陰歷

彭播皆可爲世戒也

直齋書錄解題

錢惟演

字希聖吳越王俶之子也博學能文辭召試學士院以笏起草立就真宗稱善特贈侍中謚曰思改謚曰

文僖

宋史

擁旄集五卷伊川集五卷惟演文集甚多此特其二集爾出鎮河陽河南時所作也全集未見

直齋書錄

解題

晏殊

字同叔臨川人七歲能屬文景德初神童召試賜進

士出身薨贈司空兼侍中謚元獻篆其碑首曰舊學

之碑

宋史

欽定四庫全書簡明目錄晏元獻遺文一卷殊文集本二百四十卷後自刪爲臨川集三十卷二府二十五卷今皆不傳此本爲康熙中胡亦堂所輯雖篇帙寥寥然尙存鼎之一鬣

晏元獻臨川集三十卷紫微集一卷同叔性剛峻幼孤篤學爲文溫純應用當世賢士如范文正公歐陽文忠皆出其門女適富鄭公楊察世稱其知人云集有兩本一本自作序

郡齋讀書志

臨川集三十卷二府集二十五卷年譜一卷丞相臨
淄元獻公晏殊撰其五世孫大正爲年譜言先元獻
嘗自差次起儒館至學士爲臨川集起樞廷至宰席
爲二府集今案本傳有文集二百四十卷中興書目
亦九十四卷今所刊如此爾臨川集有自序

直齋書

錄解題

宋庠

字公序安州安陸人徙開封之雍邱天聖初舉進士
開封試禮部皆以檢校太尉平章事封莒國公卒贈
太尉兼侍中諡元憲

宋史

欽定四庫全書簡明目錄宋元憲集四十卷原本久佚今從永樂大典錄出庠兄弟以落花詩得名然其詩乃晚唐纖體集中名章雋句實不止於斯其文多館閣之作沈博豔麗與尹洙歐陽修分道揚鑣譬校馬賈董體製各殊而均爲一代之作者

宋元憲集四十四卷公序本名郊字伯庠天聖二年進士第一後有忌者讒之以姓符國號名應郊天仁宗命改焉忌者之力止此後卒大用爲名臣

直齋書

錄解題

宋祁

字子京與兄庠同舉進士後贈尙書諡景文修唐書
十餘年自守亳州出入內外嘗以橐自隨爲列傳百
五十卷預修籍田記集韻又撰大樂圖二卷文集百
卷

宋史

欽定四庫全書簡明目錄宋景文集六十二卷補遺二卷
附錄一卷原本久佚今從永樂大典錄出其集原非
一種諸書所載或有永樂大典所未收今編爲補遺
二卷軼事餘聞又別爲一卷附焉祁撰唐書務爲艱
澀又刪除駢體一字不登其詩文乃博麗典雅追唐
人之格律無所謂奇險難句者

郡齋讀書志

宋景文集一百卷景文清約莊重不逮其兄以此不至公輔所撰唐書列傳不稱良史景文筆記余於爲文似遽緩年五十知四十九年非余年六十始知五

十九年非其庶幾至於道乎每見舊所作文章憎之
必欲燒棄梅堯臣喜曰公之文進矣景文未第時爲
學於永陽僧舍或問曰君好讀何書荅曰余最好大
誥故景文爲文謹嚴至修唐書其言艱其思苦蓋亦
有所自歟

案景文筆記以下原本俱脫去今據文獻通攷增入

直齋書錄解

歐陽修

字永叔廬陵人四歲而孤母鄭守節自誓親誨之學
家貧至以荻畫地學書幼敏悟過人讀書輒成誦及
冠巍然有聲宋興且百年而文章體裁猶仍五季餘

習鏤刻駢偶洪涇弗振士因陋守舊論卑氣弱修游
隨得唐韓愈遺藁於廢書簏中讀而心慕焉苦志探
賸至忘寢食必欲并轡絕馳而追與之竝舉進士試
南宮第一擢甲科熙寧四年以太子少師致仕五年
卒贈太子太師謚文忠蘇軾敘其文曰論大道似韓
愈論事似陸贄記事似司馬遷詩賦似李白識者以
爲知言 宋史

欽定四庫全書簡明目錄文忠集一百五十三卷附錄五
卷周必大編修之詩文惟居士集五十卷爲所自定
其餘別集四六集奏議內外制集從諫集之類皆他

人掇拾所編而諸集又有衢州韶州浙西廬陵京師
蘇州吉州蘇州閩中刻本遂致去取不一文句互異
必大參互考訂合爲此集較諸本特爲精善

歐陽文忠公集八十卷諫垣集八卷文忠博極羣書
好學不倦尤以獎進天下士爲己任延譽慰籍極其
力而後已於經術治其大指不求異於諸儒與尹洙
皆爲古學遂爲天下宗匠蘇明允以其文詞令雍容
似李翱切近適當似陸贄而其才亦似過此兩人至
所作唐書五代史不愧班固劉向也獨議濮邸事議
者不以爲是

希弁所藏一百五十三卷內居士集五十卷外集二十五卷易童子問三卷外內制十一卷表奏書啟四六奏議二十五卷雜著述十九卷集古錄跋語一十卷附錄五卷別一本六十一卷乃舊物也

同上

六一居士集一百五十二卷附錄四卷年譜一卷本朝初爲古文者柳開穆修其後有二尹二蘇兄弟歐公本以辭賦擅名場屋旣得韓文刻意爲之雖皆在諸公後而獨出其上遂爲一代文宗其集徧行海內而無善本周益公解相印歸用諸本編校定爲此本且爲之年譜曰居士集外集而下至於書簡集凡十

名刊之家塾其子綸又以所得歐陽氏傳家本乃公之子裴叔弼所編次者屬益公舊客曾三異校正益完善無遺恨矣居士集歐公手所定也

直齋書錄解

題

案宋初諸公駢體精敏工切不失唐人矩矱至歐公倡爲古文而駢體亦一變其格始以排纂古雅爭勝古人而枵腹空筭者亦復以優孟之似藉口學步於是六朝三唐格調寢遠不可不辨

胡宿

字武平常州晉陵人以太子少師致仕未拜而薨年

七十二贈太子太傅謚文恭

宋史

欽定四庫全書簡明目錄文恭集五十卷補遺一卷原本
久佚今從永樂大典錄出於時文格未變其駢體典
重高華方軌燕許元好問選唐詩鼓吹誤收宿詩二
十餘首好問精嫺聲律非不能鑒別體裁者知宿詩
雜置唐人中不可辨矣

范仲淹

字希文其先邠州人後徙家江南遂爲吳縣人舉進
士第卒年六十四贈兵部尙書謚文正旣葬帝書其
碑曰褒賢之碑仲淹內剛外和性至孝以母在時方

貧其後雖貴非賓客不重肉妻子衣食僅能自充而
好施予置義莊里中以贍族人汎愛樂義士多出其
門下

宋史

欽定四庫全書簡明目錄文正集二十卷別集四卷補編
五卷本名丹陽集卽蘇軾所序別集爲綦煥所輯補
編則其裔孫能濬所輯仲淹之文較琦加意於修詞
亦較有儒者氣象蓋仲淹之志在行求無愧於心事
求有濟於世古之儒者不過如斯不必圖太極衍先
天而後爲能聞聖道亦不必講封建議井田而後爲
不愧王佐也

范文正丹陽編八卷文正爲學明經術跂慕古人事業慨然有康濟之志作文章尤以傳道爲任事母至孝姑蘇之范皆疎屬置義莊以賜給之天下想聞其風采賢士大夫以不獲登其門爲恥獨梅堯臣嘗著碧雲駉一編以議詆之云集有蘇子瞻序

郡齋讀書志

范文正集二十卷別集四卷祥符八年進士曰朱說者卽公也幼孤從其母適朱氏其爲兗州推官始復姓更名

直齋書錄解題

案公讀書長白斷壘畫粥研窮六經而成王佐之學

曷嘗沾沾於詞章哉譬之本根日加培溉而蒸菌吐
華不期自致焉爾

司馬光

字君實陝州夏縣人七歲凜然如成人聞講左氏春
秋愛之退爲家人講卽了其大指自是手不釋書至
不知飢渴寒暑羣兒戲於庭一兒登甕足跌沒水中
衆皆棄去光持石擊甕破之水迸兒得活其後京洛
間畫以爲圖仁宗寶元初中進士甲科年甫冠性不
喜華麗聞喜宴獨不戴花同列語之曰君賜不可違
乃簪一枝薨年六十八贈太師溫國公歸葬陝州諡

文正賜碑忠清粹德京師人罷市往弔鬻衣以致奠
巷哭以過車及葬哭者如哭其私親嶺南封州父老
亦相率具祭都中及四方皆畫像以祀飲食必祝
宋史

欽定四庫全書簡明目錄傳家集八十卷光大儒名臣不
於文章論工拙然卽以文章而論其氣象亦包括諸
家凌跨一代蓋學問德行經濟皆文章之根柢也

文正好學如飢之嗜食於學無所不通音樂律呂天
文皆極其妙晚節尤好禮其文如金玉穀帛藥石皆
有適於用無益之文未嘗一語及之集乃公自編次

公薨子康又沒晁以道得而藏之中更禁錮迨至渡江幸不失墜後以授謝克家劉嶠得而刻版上之郡齋讀書志

傳家集一百卷今光州有集本

直齋書錄解題

治平四年閏三月擢翰林學士公力辭不許公曰臣不能爲四六上曰卿能舉士取高等而云不能四六何也公趨出遣內臣至閣門強公受告拜而不受趣公入謝至廷中以告置公懷中不得已乃受

司馬溫

公行狀

上始平龐相公書彙者年三十餘相公在樞府時始

臣等言三十三
令學作四六文字供給牋奏雖承命不敢不勉而終
以愚陋不能進益自相公出鎮以來亦遂捨置未嘗
復爲也時時荅親舊書啟則不免假手於人今知制
誥之職掌爲天子作詔文宣布華夏豈可使假手荅
書啟者爲之耶

傅家集

臣伏讀

御批通鑑續編於司馬光固辭翰林學士一條恭載

聖諭司馬光綜史傳爲通鑑其學殖淹博文詞最爲典雅
豈不能爲四六者蓋因宋承五季之後時猶崇尚俳
偶競趨浮華故光以不能四六爲辭所以矯當世之

失而返之淳朴其用意良深矣固非後世鄙陋無文
之人高談性命而蔑視辭章以自文其不學者所得
而藉口也

臣

欽誦之下再三紬繹至矣哉

聖言昭如日星司馬光學問本原及用意所在於是灼然
共見矣伏觀光所著傳家集內表啟之類亦間存四
六之作文詞典雅誠如

聖諭所云

臣

編纂此書廣引前代文人衆說講明體例冀

爲辭章之一助而愚陋之忱亦竊欲激揚末學一歸
雅正以光非不能爲四六者謹錄

御批表而出之庶幾後學有所宗仰云

元絳

字厚之生而敏悟長舉進士以廷試誤賦韻得學究
出身再舉登第薨年七十六贈太子少師諡章簡

史

元章簡玉堂集二十卷絳之祖德昭相吳越本姓危
氏臨川人唐末危全諷其伯父也德昭父曰仔倡聚
衆保鄉里兵敗自臨川奔杭州易姓元至今建昌撫
州邵武多危姓絳能文辭晚歲以王介甫薦入翰林
甚稱職遂柄用

直齋書錄解題

王安石

字介甫撫州臨川人少好讀書一過目終身不忘其
屬文動筆如飛初若不經意既成見者皆服其精妙
友生曾鞏攜以示歐陽脩脩爲之延譽擢進士上第
安石議論高奇能以辨博濟其說果於自用慨然有
矯世變俗之志於是上萬言書館閣之命屢下安石
屢辭士大夫謂其無意於世恨不識其面朝廷每欲
俾以美官惟患其不就也安石再相封舒國公元豐
二年改封荊卒年六十八贈太傅紹聖中謚曰文
忠

欽定四庫全書簡明目錄臨川集一百卷安石集在宋無

定本故或稱一百卷或稱一百三十卷或又稱後集
八十卷今所傳者惟此一百卷之本亦不知何人所
編蔡條西清詩話嘗論其誤收王禹偁王珪王安國
詩吳曾能改齋漫錄又摘其有所遺漏然欲觀安石
之詩文終不能不用此本也

王介甫臨川集一百三十卷其壻蔡卞謂自先王澤
竭習卑陋不知道德性命之理安石奮乎百世之下
追堯舜三代通乎晝夜陰陽所不能測而入於神著
雜說數萬言其言與孟軻相上下晚以所學考字畫
奇耦橫直深造天地陰陽造化之理著字說包括萬

象與易相表裏崇寧初卞之兄京秉政詔配祀文宣
王廟近時議者謂自紹聖以來學術政事敗壞殘酷
貽禍社稷實出於安石云

郡齋讀書志

舒王方嘉祐以前名重一世迹其文學論議操守使
不至大位則光明俊偉不可瑕疵矣老蘇曰使斯人
而不用也則吾言爲過而斯人有不過之歎孰知其
禍之至此哉何其知之明也

直齋書錄解題

王珪

字禹玉成都華陽人後徙舒縣歲奇警出語驚人從
兄珙讀其所賦惜曰騏驥方生已有千里之志但蘭

筋未就耳舉進士甲科神宗八年帝有疾珪曰皇太后請立延安郡王爲太子太子立是爲哲宗進珪金紫光錄大夫封岐國公卒年六十七贈太師諡曰文公賜壽昌甲第珪以文學進流輩咸其推許其文閎侈瓌麗自成一家朝廷大典策多出其手詞林稱之

朱史

欽定四庫全書簡目目錄華陽集六十卷附錄十卷原本久佚今從永樂大典錄出其附錄軼事雜說十卷則今所續加也珪不出國門坐致卿相無壯游勝覽拓其心胸亦無羈恨哀吟形於筆墨故其文多臺閣之

體其詩善言富貴當時謂之至寶丹然論其詞華則固二宋之亞也

華陽集一百卷禹玉典內外制十八年集中多大典冊詔令其詩號至寶丹以其好爲富貴語也在相位無所建明人目爲三旨於上前曰取聖旨曰領聖旨退爲吏則曰已得旨元豐末命珪本無異論亦緣其備首相不能早發大議依違遷延以召讒賊卒爲本朝大禍需事之賊也豈不然哉珪一身追貶不足道也

直齋書錄解題

劉敞

字原父臨江新喻人舉慶歷進士廷試第一編排官
王堯臣其內兄也以親嫌自列乃以爲第二集賢院
學士判南京御史臺熙寧元年卒年五十敝學問淵
博自佛老卜筮天文方藥山經地志皆究知大略宋史

欽定四庫全書簡明目錄公是集五十四卷原本久佚今
從永樂大典錄出敝談經好與先儒異然淹通古義
具有心得故其文根柢訓典具有本原朱子稱其作
文多法古絕相似又稱其文自經書中來比之蘇公
有高古之趣云

劉公是集七十五卷原甫累遷知制誥出知永興惑
官妓得驚眩疾力求便郡仁宗謂執政曰如敞者豈
易得邪賜以新橙五十爲人明白俊偉自六經百氏
下至傳記無所不通爲文章尤敏贍好摹倣古語句
度在西掖時嘗食頃揮九制各得其體英宗嘗語及
原甫韓魏公對以有文學歐陽公曰其文章未佳特
博學可稱耳

郡齋讀書志

劉敞

字貢父與敞同科拜中書舍人年六十七敞所著書
百卷尤邃史學作東漢刊誤爲人所稱預司馬光脩

資治通鑑專職漢史爲人疎儻不修威儀喜諧謔數
用以招怨悔終不能改

宋史

欽定四庫全書簡明日錄彭城集四十卷原本久佚今從
永樂大典錄出攷與兄敞齊名敞性醇靜攷則才鋒
敏捷詞辨雋利著作亦各肖其爲人然沈酣典籍文
章爾雅則一也

彭城集六十卷號公非先生敞兄弟俊敏博洽同登
慶歷六年進士第攷歷州縣二十五年晚乃游館學
元祐中始掌外制敞子奉世仲馮亦有名官至執政
世稱三劉

直齋書錄解題

呂誨

字獻可性純厚家居力學不妄與人交進士登第出知蘄州召拜御史中丞帝方倚注安石誨曰安石雖有時名然好執偏見置諸宰輔天下必受其禍一時推其鯁直病既革司馬光往省之至則目已瞑聞光哭蹙然而起張目強視曰天下事尙可爲君實勉之卒五十八元祐初詔贈通議大夫

宋史

呂獻可章奏二十卷獻可洛陽人登進士第熙寧初爲御史中丞時王安石棄官家居朝野稱其才以爲古今少倫神宗引參大政衆以爲得人獻可獨以爲

四庫全書卷三十三
三
不然居無何安石棄衆任已多變祖宗專汲汲歛民財所愛信引拔或非其人天下失望獻可屢爭不能得乃抗章曰誤天下蒼生必此人上遣使喻解執之愈堅乃出知鄧州溫公嘗服其知人誌其墓且序其章奏集云其草存者二百八十有九歷觀古人有能得其一二者已可載之史籍在獻可蓋不足道也

郡齋讀書志

蘇洵

字明允眉州眉山入至和中歐陽修薦除校書郎以霸州文安縣主簿與姚闢同修太常因革禮書成而

卒

欽定四庫全書簡明目錄嘉祐集十六卷洵集在宋凡四
本曾鞏作洵墓誌稱二十卷晁氏陳氏著錄皆十五
卷徐氏傳是樓紹興十七年婺州槧本作十五卷附
錄二卷又有邵仁泓翻雕宋本與徐本小有異同亦
十六卷今所傳者有兩本一爲凌濛初朱墨板本十
三卷又有蔡士英刻本十五卷曾鞏所誌與晁陳所
錄今不可見以所存四本相較當以徐氏宋本爲近
古今用以著錄而以邵氏宋本互核焉

蘇明允嘉祐集十五卷至和中歐陽永叔得明允書

二十二篇大愛其文辭以爲雖賈誼劉向不過也以書獻除校書郎與姚子張同編太常因革禮百卷書方成而卒治平史臣謂永叔所獻明允之文甚美然大抵兵謀權利機變之言也

郡齋讀書志

洵初入京師益帥張文定薦之歐陽公世皆知之而有雷簡夫者爲雅守以書薦之張歐及韓魏公尤力張之知洵由簡夫世罕知之雷之書文亦慷慨偉麗可觀

直齋書錄解題

蘇軾

字子瞻眉州眉山人生十年父洵游學四方母程氏

親授以書聞古今成敗輒能語其要程氏讀東漢蒯
湧傳慨然大息軾曰若爲湧母許之否乎程氏曰汝
能爲湧吾顧不能爲湧母邪比冠通經史屬文日數
千言靖國元年卒于常州年六十六嘗自謂作友如
行雲流水初無定質但當行所當行止於所不可不
止雖嬉笑怒罵之辭皆可書而誦之其體渾涵光芒
雄視百代有文章以來蓋亦鮮矣

宋史

欽定四庫全書簡明目錄東坡全集一百三十卷軾詩文
衣被天下刻本叢雜較歐陽修集更夥諸家所紀不
可殫數今亦不能悉見大抵以東坡七集爲最古以

大全集分類排纂爲易於檢尋此本卽從大全集校刊故用以著錄焉

蘇子瞻東坡前集四十卷後集二十卷奏議十五卷內制十卷外制三卷和陶集四卷應詔集十卷子瞻嘉祐中歐陽永叔考試禮部進士梅聖俞與其事得其論刑賞以示永叔至驚喜以爲異人欲以冠多士疑曾子固所爲乃寘之第二後以書謝永叔見之語客曰老夫當避此人放出一頭地又以直言薦之荅策入上等英宗在藩邸聞其名欲以唐故事召入翰林宰相不可知湖州以表謝上言事者摘其語以謗

間遣官逮赴御史獄初子瞻當王安石紛更法度之際見其事不便於民賦詩以刺焉言者從而媒孽欲與之死神宗薄其過謫置黃州溫公相哲宗累擢中書舍人除翰林學士承旨紹聖中坐草謫呂惠卿制直書其罪誣以訕謫安置惠州徙昌化元符中北還卒於常州初好賈誼陸贄書論古今治亂不爲空言旣謫黃州杜門深居馳騁翰墨其文一變平生遇事所爲詩騷銘記書檄論議率皆過人晚喜陶淵明詩和之幾徧爲人英辨奇偉於書無所不通所作文章才落筆四海已皆傳誦下至閭閻田里外至夷狄莫

不知其名門下賓客亦皆一世豪傑其盛本朝所未有也立朝知無不爲世稱其忠義嘗自比范滂孔融議者不以爲過

郡齋讀書志

東坡集四十卷後集二十卷內制集十卷外制集三卷奏議十五卷和陶集四卷應詔集十卷子瞻一字和仲自謫黃州始號東坡居士杭蜀本同但杭無應詔集

直齋書錄解題

案東坡四六工麗絕倫中筆力矯變有意擺落隋唐五季蹊徑以四六觀之則獨闢異境以古文觀之則故是本色所以奇也

蘇轍

字子由年十九與兄軾同登進士科又同策制舉蔡京當國降朝請大夫罷祠居許州復大中大夫致仕築室於許號穎濱遺老自作傳萬餘言不復與人相見終日默坐如是者幾十年政和二年卒年七十四追復端明殿學士淳熙中謚文定轍性沉靜簡潔爲文汪洋澹泊似其爲人不願人知之而秀傑之氣終不可掩其高處殆與兄軾相迫

宋史

欽定四庫全書
簡明目錄
欒城集五十卷
欒城後集二十四卷
欒城第三集十卷
應詔集十二卷
欒城集爲元

祐以前之作後集爲元祐九年至崇寧四年之作三集爲崇寧五年至政和元年之作應詔集則策論及應試之作四集皆轍所手定不似東坡集編自衆手故自宋至今猶未改其原本

子由居許十六年杜門理舊學於是詩春秋傳老子解古史書皆成自謂得聖賢遺意

郡齋讀書志

子由一字同叔樂城真定府縣也蘇氏望趙郡樂城元魏時屬趙郡故云晚居潁濱自號潁濱遺老故集或名

直齋書錄解題

曾鞏

字子固建昌南豐人神宗朝史館修撰中書舍人宋史

欽定四庫全書簡明目錄元豐類彙五十卷世所稱唐宋八家惟鞏集最爲殘缺亦最爲舛謬續彙外集自南宋已佚正集一爲明成化中楊參所刻譌漏不可勝乙又佚其年譜一爲康熙中顧崧齡所刻稍稍補正然核以何焯義門讀書記其未及校改者猶多今姑以松齡本著錄而以何焯所點勘者釐訂其脫誤焉子固師事歐陽永叔早以文章名天下壯年其文慄驚奔放雄渾瓌偉其自負要似劉向藐視韓愈以下

也晚年始在掖垣屬新官制方除目填委占紙肆書
初若不經意及屬草授吏所以本法意原職守爲之
訓敕者人人不同贍裕雅重自成一家歐公門下士
多爲世顯人議者獨以子固爲得其傳猶學浮屠者
所謂嫡嗣云

郡齋讀書志

元豐類藁五十卷續四十卷年譜一卷王震爲之序
年譜朱熹所輯也案韓持國爲鞏神道碑稱類藁五
十卷續四十卷外集十卷本傳同之及朱公爲譜時
類藁之外但有別集六卷以爲散逸者五十卷而別
集所存其什一也開禧乙丑建昌守趙汝礪丞陳東

得於其族孫濰者校而刊之因碑傳之舊定著爲四十卷然所謂外集者又不知何當則四十卷亦未必合其舊也

直齋書錄解題

案南豐代言之文古質直追三代不可以四六名之問出四六之語裁對高渾運詞典藻求之唐人張燕公有其瑰奇而無其縝密

曾肇

字子開布鞏之季弟中進士第事神宗哲宗徽宗官

至翰林學士諡文昭

宋史

欽定四庫全書簡明目錄曲阜集四卷宋曾肇撰原本散

佚此本乃其裔孫儼所蒐輯前三卷爲詩文末一卷
爲附錄肇與布鞏俱有名其立身賢於布而文章稍
不及鞏然耳濡目染俱有淵源於鞏文亦爲具體惟
遜其深厚耳

曲阜集四十卷奏議十二卷西掖集二卷內制五十
卷子開前後歷九郡帥守坐兄子宣貶亦以散官汀
州安置崇寧末移台州居京口而終封曲阜侯

讀書志

曲阜集四十卷奏議十二卷西垣集十二卷外制集
三卷內志集五卷

案文獻通考西垣集作西掖集外
志集三卷內制集五卷

作五子開元祐中爲西掖元符末再入故別名庚辰

外制集聲制誥溫潤典雅其草兄布拜相制汪玉山
稱之以爲得命次相之體

直齋書錄解題

呂公著

字晦叔夷簡子哲宗朝拜司空同平章軍國事贈申

國公諡正獻

宋史

黃庭堅

字魯直洪州分寧人幼警悟舅李常過其家取架上
書問之無不通常驚以爲一日千里第進士除右諫

議大夫責授涪州別駕

宋史

欽定四庫全書簡明目錄山谷內集三十卷外集十四卷
別集二十卷詞一卷簡尺二卷年譜三卷內集其甥
洪炎編外集李彤編別集及年譜其孫管編詞及簡
尺不知誰編內集與任氏所註本同外集別集則與
史氏所註本大異而外集後四卷凡詩四百餘篇皆
史註所無庭堅之詩得此乃全故今與注本並列焉
黃魯直豫章集三十卷外集十四卷魯直幼警悟讀
書五行俱下數過輒憶蘇子瞻嘗見其詩於孫莘老
家絕歎以爲世久無此作矣因以詩往來會子瞻以
詩得罪亦罰金元祐中爲校書郎先是秦少游晁无

咎張文潛皆以文學游蘇氏之門至是同入館世號
四學士而魯直之詩尤奇世又謂之蘇黃云紹聖初
謫戎州嘗因嘲謔忤趙正夫及正夫爲相諭部使者
以風指摘所作承天院塔記中語以爲幸災謗國遂
除名編隸宜州以崇寧四年九月三十日卒

書志

郡齋讀

豫章集五十卷

案文獻通攷作三十卷

外集十四卷著作郎黃

庭堅魯直撰自號山谷道人

直齋書錄解題

秦觀

字少游一字太虛高郵人舉進士元祐初蘇軾以賢

良方正薦除祕書省正字坐黨籍徙郴州

宋史

秦少游淮海集三十卷

郡齋讀書志

張耒

字文潛楚州淮陰人第進士元祐初仕至起居注舍

人徽宗召爲太常少卿

宋史

欽定四庫全書簡明目錄宛邱集七十六卷據周紫芝書
譙郡先生文集後知耒集在南宋之初已有四本一
本十卷一本三十卷一本七十卷一本一百卷此本
與所記四本皆不合疑後人以殘本重編然較胡應
麟所見十三卷之本則賅備多矣

柯山集一百卷元祐中蘇氏兄弟以文倡天下號長公少公其門人號四學士文潛少公之客也諸人多早沒文潛獨後亡故詩文傳於世者尤多其於詩文兼長雖同時鮮復其比而晚年更喜白樂天詩體多効之云

郡齋讀書志

宛邱集七十卷年譜一卷宛邱陳州其所居也蜀本七十五卷

直齋書錄解題

陳師道

字無己一字履常彭城人號後山居士元祐中授徐州教授

宋史

陳無已後山集二十卷公少以文謁曾南豐一見奇之許其必以文著元祐中侍從合薦於朝起爲太學博士紹聖中以進非科舉而罷建中靖國初入祕書爲正字以卒爲文至多少不中意則焚之存者才十一

郡齋讀書志

後山集十四卷外集六卷

直齋書錄解題

李昭玘

字成季任城人元豐二年進士薦歷起居舍人入黨

籍

宋史

欽定四庫全書簡目錄樂靜集三十卷昭玘以黨籍廢

棄清淨無營其人品最高其文皆光明灑落無掩抑
不吐之態亦無憤鬱不平之氣尤不可及

樂靜集鉅野李昭玘成季撰

案成季原本作成孝文
獻通考作季成俱誤今

據宋史本
傳改正

元豐二年甲科所居有樂靜堂故以名集

其姪邴漢老爲書其後

直齋書錄解題

晁補之

字无咎舉進士試開封及禮部別院皆第一爲著作

郎入黨籍

宋史

幼豪邁英爽不羣七歲能屬文日誦千言王安石名
重天下慎許可一見太奇之在杭州作文曰七述敘

杭州之山川人物之盛麗時子瞻倅杭州亦欲有所
賦見其所作歎曰吾可以閣筆矣元祐中除校書郎
紹聖初落職監信州酒後知泗州終于官大觀四年
也

郡齋讀書志

雞肋集七十卷吏部員外郎鉅野晁補之撰

直齋書

錄解題

晁詠之

字之道少有異才蘇軾守揚州補之倅州事以其詩
文獻軾軾曰有才如此獨不令我一識面耶乃具參
軍禮入謁軾下堂挽而上顧坐客曰奇才也舉進士

又舉宏詞一時傳誦其文久之提點崇福宮卒年五十二有文集五十卷

宋史

公天才英特爲文章立成明潤密緻世以爲宜在北門西掖云

郡齋讀書志

崇福集三十五卷四六集十五卷詠之景迂弟也爲

作集序

直齋書錄解題

案補之之道族兄景迂名說之字以道

李之儀

字端叔能爲文尤工尺牘軾謂入刀筆三昧

宋史

欽定四庫全書簡目錄姑溪居士前集五十卷後集二

十卷王明清揮麈後錄稱之儀尺牘最工然他作亦神鋒俊逸具蘇軾之一體軾嘗題其詩後有每逢佳處輒參禪句註家謂諷其艱澀今觀其詩實無郊島鉤棘之態知爲附會其詞矣

端叔嘗從東坡辟中山幕府後代范忠宣作遺表爲世傳誦然坐是得罪編置當塗遂居焉其弟之純官至尚書

直齋書錄解題

鄧潤甫

字溫伯建昌人第進士爲上饒尉熙寧中除集賢校理遷翰林學士兼掌皇子閣箋記一時制作獨倚潤

甫焉哲宗立潤甫在院一夕草制二十有二紹聖初
拜尚書左丞章惇議重謫呂大防劉摯潤甫不以爲
然曰俟見上當力爭無何暴卒年六十八謚曰安惠
宋史

林希

字子中福州人舉進士哲宗親政章惇欲使希典書
命逞毒于元祐諸臣遂畱行復爲中書舍人兼侍讀
自司馬光呂公著大防劉摯蘇軾轍等數十人之制
皆希爲之詞極其醜詆一日希草制罷擲筆于地曰
壞了名節矣徽宗立奪職知揚州徙舒州未幾卒年

六十七諡文節 宋史

呂惠卿

字吉甫泉州晉江人起進士爲真州推官入都見王安石論經義意多合遂定交熙寧初力薦惠卿爲參知政事鄭俠疏惠卿朋姦壅蔽惠卿恐又惡馮京異已而王安石弟安國惡惠卿姦諂面辱之于是併陷三人皆獲罪安石以安國之故始有隙惠卿旣叛安石凡可以害王氏者無不爲崇寧五年安置宣州再移廬州卒安石退處金陵往往寫福建子三字蓋深悔爲惠卿所誤也 宋史

呂吉甫集二十卷吉甫有莊子解爲文長于表奏郡
齋讀書志

案惠卿謫詞東坡乘筆一時爲之紙貴乃呂謝表語
語針對紹述之局胎于此矣司馬文正對神宗曰江
充李訓無才焉能動人主溫公此語嚴于斧鉞矣

韓忠彥

字師朴以父任爲將作監簿復舉進士徽宗卽位兼
門下侍郎封儀國公卒年七十二宋史

案忠彥琦之子入黨籍

張舜民

字芸叟邠州人中進士第爲襄樂令徽宗立擢左諫
議大夫坐元祐黨謫楚州團練副使復集賢殿修撰
卒舜民慷慨喜論事善爲文自號浮休居士

宋史

欽定四庫全書
樂大典錄出舜民慷慨好議論坐是沈滯而文集則
宋代絕重之一行于政和鬻者填巷雖爲蔡京所禁
南渡後仍雕板印行其詩詞每竄入東坡集中殆由
體格相近致誤收耳

張浮休畫墁集一百卷奏議十卷范仲淹帥邠見其
文異之用溫公薦爲諫官仕至吏部侍郎後羈置房

陵政和中卒其文豪重有理致

郡齋讀書記

舜民初用于元祐至元符末爲諫議大夫居職七日
所上事六十章崇寧初坐謝表言紹聖逐臣有曰脫
禁錮者何止一千人計水陸者不啻一萬里又曰古
先未之或聞畢竟不知其罪以爲譏謗坐貶

直齋書

錄解題

李清臣

字邦直魏人七歲能戲爲文章客有從京師來者與
其兄談佛寺火清臣從旁應曰此所謂災也或者其
蠹民已甚天固儆之邪因作浮圖灾解兄驚曰是必

大吾門韓琦聞其名以兄之子妻之舉進士治平二年試祕閣考官韓維置清臣第一徽宗立入爲門下侍郎尋爲曾布所陷出知大名府而卒年七十一宋史

淇水集八十卷李清臣撰清臣治平二年中制科歐陽公愛其文以比蘇軾其爲人亦寬博有度而趨時嗜權利首主紹述之論意規宰相亦卒不如其志直齋書錄解題

鄒浩

字志完常州晉陵人第進士調揚州潁昌府教授徽

宗遷兵吏二部侍郎再責衡州別駕竄昭州五年始得歸卒年五十二賜諡忠

宋史

道卿鄒忠公奏議十卷龜山先生爲之序公字至全上疏諫立劉皇后除名新州羈管然世所傳疏其辭詆訐蓋當時小人僞爲之以激怒者也公之子柄後因賜對首辨此事且繳元疏副本上之詔付史館

郡齋讀書志

浩旣諫立劉后坐貶徽宗初召還對上首及之獎歎再三問諫草安在曰焚之矣退告陳瓘瓘曰禍其始此乎異時姦臣妄出一緘則不可辨矣蔡京素忌之

使其黨作僞疏言劉后殺卓氏而奪其子遂得罪其在昭州作青詞告上帝有追省當時奏御之三章初無殺母取子之一字之語云

直齋書錄解題

唐庚

字子西眉州丹稜人善屬文舉進士張商英薦其才除提舉京畿常平商英罷相庚亦坐貶卒年五十一有文集二十卷兄弟五人長兄瞻字望之後名伯虎治易春秋皆有家法

宋史

欽定四庫全書簡明目錄唐子西集二十四卷原本二十二卷汪亮采重刊以三國雜事二卷附入故爲二十

四卷也庚與蘇軾同里而頗不滿于蘇軾然其詩文實毅然有以自立其不肯步趨鄉先輩亦有所恃也

唐子西集十卷

郡齋讀書志

唐子西集二十卷

案文獻通攷作十卷

其文長于論議所著皆

精確

直齋書錄解題

李邴

字漢老濟州任城縣人崇寧五年進士高宗卽位召爲兵部侍郎除翰林學士紹興五年條上戰陣守備措畫綬懷各五事不報閑居十有七年薨于泉州年六十二謚文敏有草堂集一百卷

宋史

雲龕艸堂後集二十六卷周益公作神道碑言前後集一百卷今惟後集蓋皆南渡後所作也朱文公爲之序

直齋書錄解題

汪藻

字彥章饒州德興人幼穎異入太學中進士時胡仲亦以文名人爲之語曰江左二寶胡仲汪藻紹興二年知湖州以顏真卿嘗守是邦乞表章之詔賜廟忠烈二十四年卒藻工儷語多著述所爲制詞人多傳

誦

宋史

欽定四庫全書簡目錄浮溪集三十六卷原本久佚今

從永樂大典錄出藻文章淹雅爲南渡後詞臣之冠
其隆祐太后手書建炎德音諸篇感動人心幾于陸
贄興元之詔雜文亦雅健有體其詩得于徐俯俯得
于其舅黃庭堅尤遠有淵源

汪彥章集十卷

郡齋讀書志

浮溪集六十卷四六偶儷之文起于齊梁歷隋唐之
世裴章詔誥多用之然令狐楚李商隱之流號爲能
者殊不工也本朝楊劉諸名公猶未變唐體至歐蘇
始以博學富文爲大篇長句敘事達意無艱難牽強
之態而王荊公尤深厚爾雅儷語之工昔所未有紹

聖後置詞科習者益衆格律精嚴一字不苟措若浮
溪尤其集大成者也直齋書錄解題

案駢儷之文以唐爲極盛宋人反詆譏之豈通論哉
浮溪之文可稱精切南宋作者未能或先然何可與
義山同日語哉古之四六句自爲對語簡而筆勁故
與古文未遠其合兩句爲一聯者謂之隔句對古人
慎用之非以此見長也故義山之文隔句不過通篇
一二見若浮溪非隔句不能警矣甚至長聯至數句
長句至十數字者以爲裁對之巧不知古意寢失遂
成習氣四六至此弊極矣其不相及者一也義山隸

事多而筆意有餘浮溪隸事少而筆意不足其不相
及者二也若令狐文體尤高何可妄爲軒輊乎

王安中

字履道中山陽曲人進士及第政和間爭言瑞應廷
臣輒箋表賀徽宗觀所作稱爲奇才他日出制詔二
題使其州立就上卽州後批可中書舍人宣和元年
拜尚書右丞靖康初貶單州團練副使高宗卽位內
徙道州卒年五十九爲文豐潤敏拔尤工四六之製
有初寮集七十六卷

宋史

欽定四庫全書簡明目錄初寮集八卷原本久佚今從

樂大典錄出安中喜依附名流而反覆炎涼頗干清議其交結梁師成蔡攸附和童貫王黼更小人之尤其詩文乃典雅凝重絕不類其爲人存之亦足見文章工拙不足以定人品也

初寮集十卷內制十八卷外制八卷履道真定人爲文瓌奇高妙最長于制誥李邴入翰林嘗請于上方今詞林之式上首尾舉履道之名

郡齋讀書志

初寮集四十卷後集十卷內外制二十四卷安中年十四薦于鄉凡四舉乃登第始東坡帥定武安中未弱冠猶及師事焉未卒業而坡去其後晁以道爲無

極令安中旣第修邑子禮用長牋自言以新學竊一第爲親榮非其志也以道曰爲學當謹初何患不遠到安中築室榜曰初寮其議論聞見多得于以道旣貴顯遂諱見學但稱成州使君四丈無復先生之號矣甚哉籍湜不畔之難也

直齋書錄解題

孫覲

欽定四庫全書簡明目錄鴻慶居士集四十二卷宋孫覲撰以奉祠提舉鴻慶宮故以名集覲一生巧宦殆不知世有廉恥其碑誌諛頌宦寺排抑忠良殆亦不知世有是非其詞采則汪藻蔡崇禮以外罕與抗行亦

所謂孔雀有毒不掩文章者故自宋以來無不菲薄其人而不廢其集焉內簡尺牘編注十卷其門人李祖堯編併注其文與鴻慶集多異同註中所引覲文亦或爲集所不載蓋集爲他手所編此則據其墨迹也其註多得諸親授故較任淵之註山谷集引證尤詳

孫尚書大全集五十七卷覲字仲益蘭陵人大覲主年進士常以靖康間文字得罪廢徙久之終于左朝奉郎龍圖閣待制

郡齋讀書志

覲代高麗謝賜燕樂表膾炙人口生元豐辛酉卒乾

道己丑蓋年八十有九可謂耆宿矣

直齋書錄解題

李綱

字伯紀邵武人政和二年進士積官至監察御史高宗卽位拜尚書右僕射兼中書侍郎薨年五十八贈

少卿

朱史

欽定四庫全書簡明目錄梁谿集一百八十卷附錄六卷
宋李綱撰綱人品經濟炳然史冊卽以文章而論亦
雄深雅健非株守章句者所能集中徒以喜談佛理
故諸儒不肖稱之然顏真卿孤忠勁節日月爭光終
不以書西京多寶塔碑作撫州麻姑壇記遂減其文

章之價也

梁谿集一百二十卷父夔進士起家至右文殿修撰
黃右丞履之甥也綱娶吳園先生張根之女亦右丞
外孫梁谿名集者修撰葬錫山忠定嘗廬墓云
直齋書錄解題

岳飛

字鵬舉相州湯陰人生時有大禽若鵠飛鳴室上因
以爲名未彌月河決內黃水暴至母姚抱飛坐甕中
衝濤及岸得免宣和四年真定撫劉韜募敢戰士飛
應募康王至相補承信郎紹興四年除兼荆南鄂岳

州制置使授清遠軍節度使湖北路荆襄潭州制置使封武昌縣開國子秦檜以飛不死終梗和議已必及禍故力謀殺之死時年三十九淳熙六年謚武穆嘉定四年追封鄂王

宋史

岳武穆集十卷飛功業偉矣不必以集著也世所傳誦其賀和議成一表當亦是幙客所爲而意則出于

岳也

直齋書錄解題

慕崇禮

字叔厚高密人徙淮之北海十歲能作邑人墓銘登重和元年上舍第尋拜中書舍人進用之速近世所

未有以寶文閣直學士知紹興府期年上印綬退居
台州卒年六十 宋史

欽定四庫全書簡明目錄北海集四十六卷附錄三卷原
本久佚今從永樂大典錄出凡詩文三十六卷諸體
寥寥惟制誥表啟最多亦惟是體最工後十卷爲兵
籌類要皆援據兵法系以論斷其附錄三卷則告勅
傳誌之屬也

楊萬里樓鑰爲文集序 郡齋讀書志

綦北海集六十卷工于四六秦檜初罷相密禮當制
有御筆詞頭藏其家檜再相下台州追索時密禮已

死幸不及禍

直齋書錄解題

公平時爲文不爲崖異之言而氣格渾然天成故一旦當書宣之任明白洞達雖武夫達人曉然知上意所在非規規然取青媲白以爲工者比也

樓鑰序

洪皓

字光弼番易人少有奇節慷慨有經略四方志登政和五年進士第王黼朱勔皆欲婚之力辭建炎三年議遣使金國浚薦皓于呂頤浩召與語大悅皓方居父喪頤浩解衣巾俾易入對帝悅遷禮部尚書爲大金通問使畱北中凡十五年得生還忠義之聲聞于

天下卒年六十八諡忠宣

宋史

鄱陽集十卷徽猷閣直學士鄱陽洪皓光弼撰三子

登詞科俱貴顯

直齋書錄解題

洪适

字景伯皓長子也幼敏悟日誦三千言皓使朔方适年甫十三能任家事以皓出使恩補修職郎紹興十二年與弟邁同中博學宏詞科後三年弟邁亦中是選由是三洪文名滿天下薨年六十八諡文惠

宋史

欽定四庫全書簡目錄盤洲集八十卷其集世罕傳本朱彝尊藏書最博亦僅有其詩惟此本爲毛晉汲古

閣影鈔宋槧猶完帙也适兄弟竝以詞科起家故儷
偶特爲工雅其他詩文亦尚有北宋典型

景伯自淮東總領入爲太常少卿一年而入右府又
半年而拜相然在位僅三閱月爲林安宅所攻而去
嘗一帥越閒居十六年而終

直齋書錄解題

洪遵

字景嚴皓仲子也自兒時端重如成人從師業文不
以歲時寒暑輟父畱沙漠母亡遵孺慕攀號旣葬兄
弟卽僧舍肄詞業夜枕不解衣試博學宏詞科高宗
以皓遠使擢爲祕書省正字中興以來詞科中選卽

入館自遵始拜資政殿學士淳熙元年提舉洞霄宮
十一月薨年五十有五諡文安

宋史

小隱集七十卷景嚴進用最先于兄弟而得年不永
直齋書錄解題

洪邁

字景盧皓季子也幼讀書日數千言一過目輒不忘
博極載籍雖稗官虞初釋老傍行靡不涉獵以端明
殿學士致仕卒年八十贈光祿大夫諡文敏邁兄弟
皆以文章取盛名躋貴顯邁尤以博洽受知孝宗謂
其文備衆體邁考閱典故漁獵經史極鬼神事物之

變手書資治通鑑凡三有容齋五筆夷堅志行于世
其他著述尤多

宋史

案忠宣三子接踵詞科實爲僅事固屬忠義之報然
觀其著述等身砥礪蓄積家學遞承名不虛立也

汪應辰

字聖錫玉山人紹興五年進士第一孝宗朝厯吏部

尚書翰林學士謚文定

宋史

欽定四庫全書簡明目錄文定集二十四卷應辰立朝骨
鯁其文章學問亦具有淵源故朱子頗引以爲重其
集五十卷世久無傳明程敏政于文淵閣得舊本摘

鈔八卷刊行餘遂散佚今錄永樂大典所載重爲編次鴻篇鉅製多非程本所有也

葉夢得

字少蘊蘇州吳縣人嗜學蚤成多識前言往行談論
亹亹不窮紹聖四年登進士第提舉臨安府洞霄宮
尋拜崇信軍節度使致仕卒湖州贈檢校少保宋史
石林總集一百卷年譜一卷平生所歷州鎮皆有能
聲胡文定安國嘗以其蔡穎南京之政薦于朝謂不
當以宿累廢晚兩帥金陵當烏珠臨江移三山平郡
寇其功不可沒也秦檜秉政欲令帥蜀辭不行忤檜

意以崇慶節度使致仕其居在卞山奇石森列藏書
數萬卷既沒守者不謹屋與書俱燼于火石林二字
本出楚辭天問

直齋書錄解題

任盡言

字元受眉山人元符諫官伯雨之孫仕至太常主簿
宋史

小醜集十二卷續集三卷

直齋書錄解題

范成大

字致能號石湖居士吳郡人紹興進士孝宗時拜參

知政事謚文穆

宋史

石湖集一百三十六卷致能初以起居郎使金附奏受書事抗金主于其殿陞閒歸而益被上眷以至柄用石湖在太湖之濱姑蘇臺之下去城十餘里面湖爲堂號鏡天閣又一堂扁石湖二字阜陵宸翰也今日就荒毀更數年恐無復遺跡矣頃一再過之爲之慨然

直齋書錄解題

周必大

字子充廬陵人紹興進士中詞科相孝宗封益國公

謚文忠

宋史

欽定四庫全書簡明目錄文忠集二百卷其子綸編卽宋

史所稱平園集也凡分二十七集生平所著之書亦皆編入蓋卽仿必大編歐陽修集凡例也

周益公集二百卷年譜一卷附錄一卷其家旣刊六一集故此集編次一切視其凡目其間有奉詔錄親征錄龍飛錄思陵錄凡十一卷以其多及時事託言未刊人莫之見鄭子敬守吉募工人印得之余在莆田借錄爲全書然猶漫其數十處益公自號平園叟直齋書錄解題

周益公初對玉音云向在王邸見卿詞科擬制雅宜代言不旋踵遂兼三字其後兩入翰苑首尾十年

解

學指南

案益公以文學致身宰輔享耆艾之齒好學不倦晚益精進著作之富古所未有晚歲筆意人事至而天真全歐蘇殆無以過

楊萬里

字廷秀吉水人紹興進士進寶文待制致仕謚文節
宋史

誠齋集一百三十三卷廷秀當淳熙末爲大蓬論思陵配饗不合去及韓侂冑用事召之卒不至自次對遷至學士聞開禧出師不食而死自作江湖集序曰

予少作有詩千餘篇至紹興壬午皆焚之大概江西
體也今所存曰江湖集者蓋學后山及半山及唐人
者也

案自作江湖集序以下一段原本脫去今據文獻通攷增入

直齋書錄解

案誠齋集四六小篇俱精妙絕倫往往屬對出自意
外妙若天成南宋諸公皆不及

陸游

字務觀越州山陰人年十二能詩文鎖廳薦送第一
秦檜孫埴適居其次檜怒顯黜之檜死始赴福州寧
德簿范成大帥蜀游爲參議官以文字交不拘禮法

自號放翁卒年八十五

宋史

渭南集三十卷

案文獻通考作二十卷

務觀左丞佃之孫詩爲

中興之冠文亦佳渭南者封渭南縣伯

直齋書錄解

題

樓鑰

字大防明州鄞縣人隆興元年試南宮冠末等試教

官調溫州教授擢中書舍人除端明殿學士進參知

政事位兩府者五年嘉定六年薨年七十七謚宣獻

鑰文辭精博自號攻媿主人

宋史

攻媿集一百二十卷隆興癸未省試考作賦魁以犯

諱當黜知舉洪文安遵奏收寘末甲首

直齋書錄解

題

危稹

字逢吉撫州臨川人淳熙十四年進士嘉定九年充博選著作佐郎出知漳州久之提舉崇禧觀與鄉里耆艾爲真率會卒年七十四所著有巽齋集

宋史

李劉

欽定四庫全書簡明目錄四六標準四十卷宋李劉撰其門人羅逢吉編明孫雲翼箋注劉事迹無可稱述惟以四六爲專門大抵以流麗穩貼爲宗無復唐以來

渾厚之氣亦世變爲之也凡分七十一目一千七十六首逢吉欲尊其師傳故題曰標準雲翼嘗注橋山四六頗爲蕪雜此注亦畧相同

紫梅亭四六雕琢過甚近于纖冗排偶雖工神味全失駢體至此發洩太盡難以復古矣

魏了翁

字華父邛州蒲江人年十五著韓愈論抑揚頓挫有作者風慶元五年進士授僉書劍南西川節度判官遷校書郎知漢州嘉定十五年進兵部郎中嘉熙元年知福州累章乞骸骨不允疾革門人問疾者猶衣

冠相與酬荅口授遺奏拱手而逝諡文靖所著有鶴

山集

宋史

欽定四庫全書簡明目錄鶴山集一百九卷了翁研思經術其文根柢醇正而紆餘宕折出以自然無江湖遊士叫囂狂躁之氣亦無講學諸儒空疎迂腐之習在南宋中葉可謂不轉移于流俗矣

真德秀

字景元浦城人四歲受書十五而孤母吳氏力貧教之慶元五年進士繼試中詞科紹定五年知泉州召爲戶部尚書踰年拜參知政事諡文忠

宋史

西山集五十六卷

直齋書錄解題

案南宋駢體西山先生爲一大家華而有骨質而彌工不染詞科之習野處誠齋而下皆不及也

王邁

欽定四庫全書簡明目錄驪軒集十六卷原本久佚今從永樂大典錄出邁以抗直著其奏疏多危言正論詩文亦皆俊偉光明

方岳

欽定四庫全書簡明目錄秋崖集四十卷宋方岳撰岳天才駿厲洪焱祖爲作小傳稱其詩文四六不用古律

以意爲之語或天出可謂兼盡其短長其集世有二
本詳略互見今刪除重複合爲一編著於錄

劉克莊

欽定四庫全書簡明目錄後村集六十卷宋劉克莊撰克
莊從真德秀講學年至八十乃媚附于賈似道人品
詩品遂並頹唐然時出清新亦未可盡廢文體雅潔
較詩爲勝題跋諸作乃獨擅勝場

文天祥

字宋瑞吉安人年二十舉進士第一拜右丞相加少
保信國公厓山破至燕三年終不屈臨刑從容曰吾

事畢矣其妻歐陽氏收其屍面如生年四十七 宋史

欽定四庫全書簡明目錄文山集二十一卷凡詩文十七
卷指南前錄一卷後錄二卷紀年錄一卷天祥大節
炳然不必以詞章重而詞章實卓然可傳農田餘話
稱其不獨忠義冠一時亦斯文閒氣之發見非虛語
也

衛博

欽定四庫全書簡明目錄定菴類彙四卷宋衛博撰原本
久佚今從永樂大典錄出其中表割箋啟序記書疏
代人作者十之九蓋當時亦以四六擅場故假手者

衆其文工穩流麗頗有汪藻孫覲之遺音

廖行之

欽定四庫全書簡明目錄省齋集十卷宋廖行之撰原本久佚今從永樂大典錄出其文多傷質樸然理勝其詞惟四六頗流麗原跋稱其多互見周必大省齋集中今檢必大全集無一篇與此相複殆知其誤取而刪削歟

周南

字南仲平江人年十六游學吳下文詞雅麗精切登紹熙元年進士開禧三年召試館職對策詆權要言

者劾罷之卒于家

宋史

欽定四庫全書簡明目錄山房集九卷宋周南撰原本久佚今從永樂大典錄出凡前集八卷後稟一卷大致以四六爲最工其秦檜降爵易諡勅林下偶談困學紀聞各引爲佳話其以是事擅場可知也

李廷忠

欽定四庫全書簡明目錄橘山四六二十卷宋李廷忠撰明孫雲翼箋注北宋四六大都溫雅南宋漸變爲纖巧廷忠當淳熙紹熙之間正風氣升降之際故格意不免稍卑又嗜博矜新亦或傷繁冗然組織工穩其

佳處亦不可沒雲翼所注頗爲蕪雜姑存以備考云
爾

無名氏

欽定四庫全書簡明目錄壺山四六一卷不著撰人名氏
南宋中葉號壺山者凡四人以其除福建漕司謝喬
平章啟考之似當爲方大琮作而大琮集中又不載
豈其族孫良永等撮拾遺文之時偶未見歟疑以傳
疑姑置于大琮集後

王子俊

欽定四庫全書簡明目錄格齋四六一卷宋王子俊撰子

俊有三松類稿今已散佚此卽其類稿之一種也楊
萬里稱其四六追步歐蘇不論汪藻孫覿推挹稍過
然卽此一卷而論典雅流麗漸近自然與汪孫亦分
路揚鑣也

王應麟

字伯厚慶元人淳祐元年進士初應麟登第言曰今
之事舉子業者沽名譽得則一切委棄制度典故漫
不省非國家所望于通儒于是發憤誓以博學宏詞
科自見假館閣書讀之寶祐四年中是科應麟與弟
應鳳同日生開慶元年亦中是科詔褒諭之度宗卽

位遷禮部尚書所著有深寧集一百卷

宋史

欽定四庫全書簡明目錄四明文獻集五卷宋王應麟撰
應麟深寧叟集一百卷久已散佚此乃四明文獻集
中之一種故一人之作而題以總集之名也所錄文
凡一百七十餘篇而制誥居十之七雖不盡所長尚
足見其崖畧

作家七

元四六諸家

周復

字子靖其先平陽和州人父忠避兵高唐州遂家焉
始生有奇光照室及長性簡重美丰儀大德三年拜

翰林學士承旨卒年七十七諡文康有靖軒集五十卷傳于世

元史

姚燧

字端甫平州柳城人左丞樞之從子也生三歲而孤樞育之方隱居蘇門山謂燧蒙闇教督之過急燧不能堪楊奐止之曰燧令器也長自有成何急爲且許醮以女年十三見許衡于蘇門十八始受學仁宗居藩邸起爲太子賓客改翰林學士承旨卒年七十六諡文曰有牧庵文集五十卷

元史

欽定四庫全書簡目目錄牧菴文集三十六卷原本久佚

今從永樂大典錄出燧學出許衡而文章過衡遠甚
雄深雅健綽有古風碑誌尤足補史闕有元一代自
虞集之外罕能旗鼓相當也

公才氣驅駕縱橫開闔紀律惟意約要于煩出奇于
腐江海駛而蛟龍擎風霆薄而元氣溢

張養浩序

王惲

字仲謀衛州汲縣人少好學與東魯王博文渤海王
旭齊名至元五年建御史臺首拜監察御史元貞五
年致仕卒封太原郡公諡文定其著述有秋澗集

元史

欽定四庫全書簡明目錄秋澗集一百卷惲詩文源出元
好問故意度波瀾具有軌範足以嗣響其師奏議尤
疏暢詳明瞭如指掌史稱惲有才幹語殆非虛其所
著書四種皆編入集中亦有資考證

案中統元年惲轉翰林修撰同知制誥玉堂嘉話云
其宣詞曰行已無忝博學能文顧超絕之逸才足鋪
張于偉蹟宜司綸命以贊皇猷

袁桷

字伯生慶元人幼學文脫去凡近長益畱心典故舉
茂才異等歷拜集賢直學士卒封陳畱郡公諡文清

所著有清容居士集五十卷

元史

欽定四庫全書簡明目錄清容居士集五十卷楠早從戴表元王應麟舒岳祥諸遺老游文律詩法具有授受又博覽古籍練習舊章故冊誥之文典禮之議爲一時弁冕詩亦高華俊逸能自成家與鄧文原等崛起大德延祐之間稱藝林領袖蓋不虛焉

虞集

字伯生蜀郡人父汲爲黃岡尉宋亡避亂趨嶺表干戈中無書可攜集母楊氏祭酒楊文仲女也口授集論語孟子左氏傳歐蘇文過耳輒成誦比還長沙就

外傳始得刻本則已盡讀諸經通大義大德初以薦授京學教授除國子博士俄拜翰林直學士兼祭酒卒封仁壽郡公諡文靖有道園集古錄五十卷

元史

欽定四庫全書簡目錄道園學古錄五十卷金元之間元好問爲文章耆宿迨之季則以集爲大宗此集凡分四編曰在朝藁曰應制藁曰歸田藁曰方外藁雖所作不僅于此而菁華薈萃已見大凡其陶鑄羣材固不減廬陵之在北宋也道園遺藁十六卷其從孫堪編蓋以補學古錄之遺也較世所傳道元類藁增多五百餘篇集之名章鉅製亦約畧盡此矣

劉壘

欽定四庫全書簡明目錄水雲村藁十五卷壘才力雄贍
尤工於四六隸事鑄詞具有精采然壘之所長在以
散體爲四六壘所短卽在以四六爲散體故其雜文
不古不今轉成僞體

王銍

附

欽定四庫全書簡明目錄四六話二卷宋王銍撰古無專
論四六之書有之自銍始所論多宋人表啟之文大
抵舉其工巧之聯而氣格法律皆置不道故宋之四
六日卑然就一朝風氣而言則亦多推闡入微者如

詩家之有句圖不可廢也

附四六話原序

先君子少居汝陰鄉里而游學四方學文于歐陽文忠公而授經于王荊公王深父常夷父旣仕從滕元發鄭毅夫論作賦與四六其學皆極先民之淵蘊鉅每侍教誨常語以爲文爲詩賦之法且言賦之興遠矣唐天寶十二載始詔舉人策問外試詩賦各一首自此八韻律賦始盛其後作者如陸宣公裴晉公呂溫李程猶未能極工逮至晚唐薛逢宋言及吳融出于場屋然後曲盡其妙然但山川草木雪風花月或

以古之故實爲景題賦于人物情態爲無餘地若夫
禮樂刑政典章文物之體畧未備也國朝名輩猶維
五代衰陋之氣似未能革至二宋兄弟始以雄才奧
學一變山川草木人情物態歸于禮樂刑政典章文
物發爲朝廷氣象其規模闔達深遠矣繼以滕鄭吳
處厚劉輝工緻纖悉備具發露天地之藏造化殆無
餘巧其躡括聲律至此可謂詩賦之集大成者亦繇
仁宗之世太平閒暇天下安靜之久故文章與時高
下蓋自唐天寶遠迄于天聖盛于景祐皇祐溢于嘉
祐治平之間師友淵源講貫磨礪口傳心授至是始

克大成就者蓋四百年于斯矣豈易得哉豈一人一日之力哉豈徒此也凡學道學文淵源從來皆然也世所謂箋題表啟號爲四六者皆詩賦之苗裔也故詩賦盛則刀筆盛而其衰也亦然銍類次先子所謂詩賦法度與前輩話言附家集之末又以銍所聞于交游間四六話事實私自記焉其詩話文話賦話各別見云老成雖遠典刑尚存此學者所當憑心而致力也且以昔聞于先子者爲之序欲自知爲文之難不敢苟且于學問而已匪欲誇諸人也宣和四年七月庚申日汝陰王銍序

謝伋附

欽定四庫全書簡明目錄四六談麈一卷宋謝伋撰其論四六多以命意遣詞分工拙所見在王銍四六話上其論長句全句尤切中南宋之弊也

附四六談麈原序

三代兩漢以前訓誥誓命詔策書疏無駢麗粘綴溫潤爾雅先唐以還四六始盛大約取便于宣讀本朝自歐陽文忠王舒國敘事之外作爲文章制作渾成一洗西崑磔裂煩碎之體厥後學之者益以衆多況朝廷以此取士名爲博學鴻詞而內外兩制用之四

六之藝誠曰大矣下至往來牋記啟狀皆有定式故
設之應用四方一律可不習而知予自少時聽長老
持論多矣憂患以後悉皆遺忘山居厯年飽食終日
因後生之問可記者輒錄之以資讚學之一事如古
今五七字話題爲四六談麈云他時有得當附益諸
紹興十一年五月十三日陽夏謝伋序

跋

我夫子既逝之九年阮芸臺宗伯視學吾浙乃屬令
子曾美以所著四六叢話一書付之剞劂經始丁巳之
秋越八月而告成

廣寧

受而讀之泫然曰此吾師三

十年精力所瘁也至今日而觀厥成乎夫文章之道有
散行卽有排比天地自然之數也三代以上渾渾噩噩
雖有端緒其文不詳靈均宋玉濫觴伊始漢興鄒枚班
馬竝繼聯鑣魏晉以來黃初七子二陸三張咸有述作
江邱任沈含藻佩華子山孝穆蔚乎大觀六代之際稱
美備焉唐則燕許王楊元白溫李後先接踵而宣公奏

議篤雅真摯生面獨開宋則變端莊爲流麗歐陽王蘇其最著也元初袁揭雖沿別派不失正宗歷代以來彬彬乎盛矣然而蕭統之文選劉勰之文心雕龍不過備文章詳體例從未有鉤元摘要挾作者之心思匯詞章之淵藪使二千年來駢四儷六之文若燭照數計如我夫子之集大成者也猶憶乙巳丙午間 夫子宫太

平司馬

廣寧

受業於鳩江官舍見政事之暇輒手一編

丹黃甲乙寒暑無間其時同學若方君求升程君杲馮君錫宸二三知己執經問字竝蒙嘉許而芸臺宗伯則又丙午分校所得士也今諸君或致身制科或馳名日

下而廣寧以蔭補官浮沈宦海負我師教誨裁成之

德者甚鉅每讀斯篇覺口講指授形情歷歷在目而音容則既渺矣梁木之感觸緒紛來未嘗不掩卷三嘆也雖然師有及門善成厥志又有賢子克竟其功嘉惠學者昭示來茲師之功偉矣師之志亦可慟矣廣寧雖不得承師之緒而一燈風雨甘苦深知何敢以謏陋辭敬誌其略以告世之讀是書者受業門人山陰陳廣寧謹跋

跋

四六叢話三十三卷先兄春浦先生所輯也丁巳秋其
子俞美欲以壽世屬余讎校余生於通潞宗族克見者
罕昔兄獻賦入都過門停車信宿而去自昔厥後邈若
墜雨迄今二十年矣聞兄於是書致力數十年藏書甚
夥懷餅就鈔之昔多兼之遊宦於南運艘於北王程風
雨官閣晦明遇目卽收翹慙甚矣於庚戌春季甫脫稿
卽以是秋捐館以故昔代次序之間微有先後傑僞者
尙未加詮次今將鋟稿已不能面質氏飛回首前塵如
夢如幻三復是冊慙惘何如肯

嘉慶三年二月弟寧衷謹識

選詩叢話

烏程 孫梅 輯

文選張景陽雜詩叢竹森如束元微之連昌宮中滿宮
竹歲久無人森如束蓋用此

芥隱筆記

文選古詩何能待來茲用呂氏春秋今茲美禾來茲美

麥注茲年也

同上

文選古詩有思君令人老曹子建有沈憂令人老其本

出唯憂用老耳

同上

李善文選秋胡詩注引易歸藏曰君子戒車小人戒徒

亦可以見亡書之語

學齋佔畢

文彩雙鴛鴦裁爲合歡被著以長相思緣以結不解注
被中著綿謂之長相思綿綿之意緣被四邊綴以絲縷
結而不解之意余得一古被四邊有緣眞此意也著謂
充以絮

侯鯖錄

擬古惟江文通最長擬淵明似淵明擬康樂似康樂擬
左思似左思擬郭璞似郭璞獨擬李都尉一首不似西
漢耳雖謝康樂擬鄴中諸子之作亦氣象不類至於劉
元休擬行行重行行等篇鮑明遠代君子有所思之作
仍是其自體耳

滄浪詩話

蘇子卿詩幸有絃歌曲可以喻中懷請爲游子吟泠泠

一何悲絲竹厲清聲慷慨有餘哀長歌正激烈中心愴
以摧欲展清商曲念子不能歸今人觀之必以爲一篇
重複之甚豈特如蘭亭絲竹管絃之語耶古詩正不當
以此論之也

同上

劉公幹贈五官中郎將詩昔我從元后整駕至南鄉過
彼豐沛都與君共翱翔元后蓋指曹操也至南鄉謂伐
劉表之時豐沛都喻操譙郡也王仲宣從軍詩云籌策
運帷幄一由我聖君聖君亦指曹操也又曰竊慕負鼎
翁願厲鈍朽姿是欲效伊尹負鼎干湯以伐桀也是時
獻帝尙在而二子之言如此一日元后一日聖君正與

荀彧比曹操爲高光同科或以公幹平視美人爲不屈
是未爲知人之論 同上

古人贈荅多相勉之詞蘇子卿云願君崇令德隨時愛
景光李少卿云努力崇明德皓首以爲期劉公幹云勉
哉修令德北面自寵珍杜子美云君若登台輔臨危莫
愛身往往有此意 同上

古詩十九首非止一人之詩也行行重行行樂府以爲
枚乘之作其他可知矣 古詩十九首行行重行行玉
臺作兩首自越鳥巢南枝以下別爲一首當以選爲正
文選長歌行只有一首青青園中葵者郭茂倩樂府

有兩篇次一首乃仙人騎白鹿者仙人騎白鹿之篇余疑此詞峇峇山上亭以下其義不同當又別是一首郭茂倩不能辨也 文選飲馬長城窟古詞無人名玉臺以爲蔡邕作

同上

江州陶靖節集末載宣和六年臨溪曾紘謂靖節讀山海經詩其一篇云形夭無千載猛志固常在疑上下文義不貫遂按山海經有云形夭獸名口銜干戚而舞以此句爲形夭舞干戚因筆畫相近五字皆訛岑穰晁詠之撫掌稱善余謂紘說固善然靖節此題十三篇大槩篇指一事如前篇終始記夸文則此篇恐專說精衛銜

木填海無千歲之壽而猛志常在化去不悔若併指形
天似不相續又況末句云徒設在昔心良晨詎可待何
預千戚之猛耶

二老堂詩話

舒公云池塘生春草園柳變鳴禽之句謂有神助其妙
義不可以言傳而古今文士多從而稱之獨李元膺曰
予觀此句未有過人處古人意有所至則見於情詩句
蓋其寓也謝公平生喜見惠連故夢中得之蓋當論其
情意不當泥其句也如謝東山喜見羊曇羊叔子喜見
鄒湛王述喜見坦之皆其情意所至不可名狀

冷齋夜

話

池塘生春草園柳變鳴禽世多不解此語爲工蓋欲以
奇求之耳此語之工正在無所用意猝然與景相遇借
以成章不假繩削故非常情所能到詩家妙處當須以
此爲根本而思苦難言者往往不悟鍾嶸詩品論之詳
矣其略云思君如流水既是卽目高臺多悲風亦惟所
見清晨登隴首羌無故實明月照積雪非出經史古今
勝語多非補假皆由直尋顏延之謝莊尤爲繁密於時
化之故大明泰始中文書殆同書抄近任昉王元長等
辭不貴奇競須新事邇來作者寢以成俗遂乃句無虛
語語無虛字牽攣補衲蠹文已甚自然英旨罕遇其人

余每愛此言簡切明白易曉但觀者未嘗留意耳
石林
詩話

綢繆兩字而有數義詩云綢繆牖戶注云纏綿也王粲
云綢繆清燕娛五臣云綢繆親重貌吳質荅東阿王書
云是何慰喻之綢繆乎注云綢繆殷勤之意也
西溪叢
語

樂府解題有梁父吟蜀志諸葛亮傳云亮躬耕隴畝好
爲梁父吟陸士衡擬今日良宴會云齋僮梁父吟李善
注云蔡邕琴頌曰梁父悲吟不知名爲梁父何義張衡
四愁詩云欲往從之梁父艱注云泰山東嶽也君有德

則封梁父泰山下小山名諸葛亮好爲梁父吟恐取此

意

同上

陶潛讀山海經十三首用事今本多差誤各爲注釋之
第一篇泛覽周王傳乃周穆王傳荀勗校定本是也流
觀山海圖乃山海經十八卷郭璞注本是也第二篇云
玉堂凌霞秀王母始妙顏天地共俱生不知幾何年靈
化無窮已館宇非一山高酣發新謠寧效俗中言西山
經云玉山是王母所居其狀如人豹尾虎齒而善嘯蓬
頭戴勝是司天之厲主五殘大荒西經云西海之南流
沙之濱赤水之後黑水之前有大山名曰崑崙之邱有

人戴勝虎齒有豹穴處名曰西王母又云大荒之中有
山名豐沮玉門西有王母之山又云以崑崙爲宮亦有
離宮別窟郭璞云不專住一山也穆天子傳云吉日甲
子天子賓於西王母執元圭白璧以見西王母於瑤池
之上又天子升於奄山卽西王母之山也奄山卽奄茲
山也西王母宴穆王於瑤池之上王母爲天子謠曰白
雲在天山陵自出道里悠遠山川間之將子無死尙能
復來與穆往復數詩不具載第三篇云迢遞槐江嶺是
謂元圃邱正南望崑墟光氣難與儔亭亭明玕照落落
清瑤流恨不及周穆託乘一來遊槐江之山邱時之水

出焉其陽多丹粟其陰多采黃金銀寶惟帝之平圃郭璞注云卽元圃也南望崑崙其光熊熊其氣魂魂其上多藏琅玕爰有淫水其清洛洛淫音遙穆天子傳天子銘跡於元圃之上第四篇云丹木生何許迺在崑山陽黃花復米實食之壽命長白玉凝素液瑾瑜發奇光豈伊君子室見重我軒皇西山經云西北四百二十里曰崑山其上多丹木圓葉而赤莖黃花而赤實其味如飴食之不饑丹水出焉西流注於稷澤其中多白玉是有玉膏沸沸湯湯黃帝是食是饗是生元王玉玉膏所出以灌丹木五色乃清第五篇云翩翩三青鳥毛色奇可憐

朝爲王母使暮歸三危山我欲因此鳥具向王母言在世無所須惟酒與長年三危之山三青鳥居之是山廣圖百里青鳥主爲王母取實竹書云穆王西征至青鳥所解又蛇巫之山一曰龜山西王母梯几而戴勝杖其南有三青鳥爲西王母取食又有三足鳥主給使也第六篇云逍遙蕪臯上杳然望扶木洪杪百萬尋森散覆暘谷靈人待丹池朝朝爲日浴神景一登天何幽不見燭黑齒國人黑手食稻使蛇其一蛇赤下有暘谷上有扶木卽扶桑木十日所浴在黑齒北居水中有大木九日居下枝一日居上枝第七篇云粲粲三珠樹寄生赤

水陰亭亭凌風桂八幹共成林靈鳳撫雲舞神鸞調玉
音雖非世上寶爰得玉母心謹來國在赤水之陰有三
珠樹如柏葉皆爲珠其樹若曄海西南經桂林八樹在
番禺東八樹而成林言其大也丹穴之山有鳥焉其狀
如雞五采而文乃鳳也自歌自舞女牀之山有鳥如翟
而五采又名曰鸞自歌見則天下康寧第八篇云自古
皆有沒何人得靈長不死復不老萬歲如平常赤泉給
我飲圓邱足我糧方與三辰遊壽考豈渠央列子云北
海之北其國名曰終北四方悉平圍以喬陟當國之中
有山山名壺飲狀若甌甌頂有口狀若圓環名曰滋穴

有水湧出名曰神瀆臭過椒蘭味過醪醴一源分爲四
埒注於山下經營一國無不周徧土氣和無札厲不夭
不病人倦則飲神瀆周穆王北遊過其國三年忘歸今
赤泉山海經無之知古文缺失也第九篇云夸父誕宏
志乃與日競走俱至虞淵下似若無勝負神力旣殊妙
傾河焉足有餘跡寄鄧林功竟在身後海外北經云夸
父與日逐走渴欲飲於河渭不足飲大澤未至道渴而
死棄其杖化爲鄧林又云夸父不量力欲追日景逮之
禺谷郭璞云禺淵也第十篇云精衛銜微石將以填滄
海刑天舞干戚猛志故常在同物旣無慮化去不復悔

徒設在背心良辰詎可待發鳩之山有鳥焉其狀如鳥而文首白喙名曰精衛其鳴自諒是炎帝之少女名曰女娃遊於東海溺而不返故爲精衛常銜西山之木石以堙東海奇肱之國刑天與帝爭神帝斷其首葬之常羊之山乃以乳爲目以臍爲口操干戚而舞第十一篇云巨猾肆威暴欽鵠違帝旨竄竄強能變祖江遂獨死明明上天鑒爲惡不可履長枯固已劇鵠鵠豈足恃鐘山神其子曰鼓其狀人面而龍耳是與欽鵠殺葆江於崑崙之陽葆江卽祖江也帝乃戮之鐘山之東曰崑崙鵠音下邳之邳瑤音遙曰巨猾肆暴者謂欽鵠殺祖江

貳負臣殺竇窻也猾作危字非是欽鵒化爲大鶚鼓亦
化爲鵒鳥鶚音謬鵒音俊或云鵒鶚字非也竇窻者蛇
身人面爲貳負臣所殺開明東有巫夾竇窻之尸皆操
不死之藥以距之竇窻變爲龍首居弱水中食人音軋
俞第十二篇云鵒鵒見城邑其國有放士念彼懷王世
當時數來止青邱有奇鳥自言獨見爾遂爲迷者生不
以喻君子拒山西臨流黃北望諸昆東望長右見鳥焉
其狀如鵒而人手其音如痺其名曰鵒其鳴自號見則
其國多放士放逐也懷王之世謂屈原也青邱國有奇
鳥不詳其狀鵒鵒或爲鵒鵒或爲鳴鵒皆非也第十三

篇云巖巖顯朝市帝者慎用才何以廢共鯀重華爲之
來仲文獻誠言姜公乃見猜臨沒告饑渴當復何及哉
竹書紀年堯欲禪舜其工鯀諫以爲不可舜卽位殛鯀
于羽山流共工於幽州海內經云鯀竊帝之息壤以堙
洪水不待帝命帝令祝融殺鯀于羽郊神異經云西北
荒有人二面朱髯蛇身人手四足食五穀禽獸頑愚名
曰共工東方有人焉人形而身多毛自解水土志加通
塞爲人自用欲爲欲息名曰鯀下云仲文姜公未詳

上

子建之七哀主哀思婦仲宣之七哀主哀亂離孟陽之

七哀主哀邱墓呂向爲之說曰七哀者謂痛而哀義而
哀感而哀怨而哀耳目聞見而哀口歎而哀鼻酸而哀
且哀之來也何者非感何者非怨何者非目見而耳聞
何者不嗟歎而痛悼呂向之說可謂疎矣大抵人之七
情有喜怒哀樂愛惡欲之殊今而哀戚太甚喜怒哀惡
等悉皆無有情之所繫惟有一哀而已故謂之七哀不
然何不云八云六而必曰七哀乎

敬齋古今

阮籍詠懷云李公悲東門蘇子狹三河張銑曰蘇秦本
洛陽人洛陽三川之地則三河也沈約曰河南河東河
北秦之三川郡古人舉水皆曰河耳旣又云驅馬復來

歸反顧望三河向曰晉文王河內人故語稱三河是則河南洛陽河東河南河北皆得稱之爲三河也取三川以釋三河母乃疎乎按史記張儀曰下兵三川以臨二周之郊又曰今三川周室天下之市朝也莊襄王元年初置三川郡韋昭曰有河洛伊故曰三川如史遷所記韋昭所解三川之與三河大不相類

同上

陸士衡君子有所思行末云宴安銷靈根酖毒不可恪意謂宴安酖毒不可恪耶然不可恪三字太逕庭不似詩家語不可當倒恪愼也可不恪則言不可不慎

同上

五臣注文選謂陶淵明詩自晉義熙以後皆題甲子後

世因仍其說獨治平中虎邱僧思悅編淵明詩辨其不然其說曰淵明之詩題甲子者始庚子迄丙辰凡十七年皆晉安帝時所作至恭帝元熙二年庚申歲宋始受禪庚子至庚申蓋二十年豈有宋未受禪前二十年恥事二姓而題甲子之理曾裘父艇齋詩話亦信其說然以余考之元興二年桓元篡位晉氏不斷如纔得劉裕而始平改元義熙自此天下大權盡歸劉氏淵明賦歸去來辭實義熙元年也至十四年劉公爲相國恭帝卽位改元元熙至二年庚申禪於宋觀恭帝之言曰桓元之時晉氏已亡重爲劉公所延將二十載今日之事本

所甘心詳味此言則劉氏自庚子得政至庚申革命凡二十年淵明自庚子以後題甲子蓋已知其末流必至於此忠之至義之盡也思悅裴父殆不足以知之

碧湖

雜志

初學記月門中以吳牛對魏鵲吳牛以不耐熱見月亦喘然魏鵲者引魏武帝歌行月明星稀烏鵲南飛爲據甚疎闊如此則蓋言魏烏乎漢武帝秋風詞云秋風起兮白雲飛草木黃落兮雁南歸今旣云魏鵲則風事亦用漢雁若是採掇文字何所不可東海徐公碩儒也何乖之甚

學齋估畢

陳思王七步之捷用事者移於常人宜矣若襄今朝諸王則大不佳何者七步所成詩卽燃箕煮豆之二十字也其可當諸王所用哉梁代任昉襄竟陵王行狀云淮南取貴於食時陳思見稱於七步雖梁人襄王固無忌諱然欠審爾若以諸王爲捷幸有十步事而新何不採於後魏耶

同上

文選昭明太子所作昭明在梁時亦鬱鬱不樂移其志於文選考之集中諸公負一世之名者皆不得其善終班固張華郭璞機雲嵇康潘岳謝靈運輩嘗讀其詩感愴之言近似鬼語屈原離騷有山鬼國殤良可哀也

貴

耳集

王文公詩功謝蕭規慙漢第恩從隗始詫燕臺然史記止云爲隗改築宮而師事之初無臺字而李白詩有何人爲築黃金臺之語吳虎臣漫錄以此爲據按新序通鑑亦皆云築宮不言臺也然李白杜甫柳子厚屢慣用黃金臺事白氏六帖有燕昭王置千金於臺上以延天下士謂之黃金臺此語唐人相承用者甚多不特本於白也後漢孔文舉論盛孝章書曰昭築臺以延郭隗然皆無黃金字宋鮑照放歌行云豈伊白屋賜將起黃金臺然則黃金臺之名始見於此李善注引王隱晉書段

匹碑討石勒屯故燕太子丹黃金臺又引上谷郡圖經
曰黃金臺在易水東南十八里昭王置千金臺上以延
天下士且燕臺事多以為昭王而王隱以為燕丹何也
余後見水經注云固安縣有黃金臺耆舊言昭王禮賢
廣延方士故修建下都館之南陲燕昭創於前子丹踵
於後以此知王隱以為燕丹者始此也

齊東野語

左思詠史云金張藉舊業七葉珥漢貂善曰班固漢書
金日磾贊曰漢庭七葉內侍何其幸也七葉自武至平
也又張湯傳贊曰張氏之子孫相繼自宣元以來為侍
中中常侍者凡十餘人侍中中常侍固珥貂矣然言七

葉珥漢貂者固金氏非張氏也舉其貴寵因連言之

淵

泉日記

顏延年五君詠阮步兵末云物故不可論途窮能無慟
物故世故也一世之事舉不可論憤激之極理勢窘蹙
不能無慟或云物故卽古人也前書音義謂人死爲物
故顏以嗣宗謂古人不必論議所當論者惟在當世之
事而魏晉之交一時人物又皆不足論故托跡獨駕不
由逕路至於車跡所窮不能不慟哭也

同上

顏延年荅鄭尚書詩云何以銘嘉貺言樹絲與桐桐固
可以言樹也絲亦可以言樹乎

同上

范蔚宗樂遊苑應詔詩末云聞道雖已積年力互頽侵

探已謝丹蘄感事懷長林

刊本作丹微

又顏延年和謝監詩

云伊昔遭多幸秉筆侍兩闈雖慙丹蘄施未謂元素睽
呂延濟呂向皆以丹蘄爲榮祿而李善又以爲君恩皆
非也丹蘄所以爲國家之光華也范意謂揣已空疎不
足以華國故感事思歸顏意謂雖無文章可以華國爲
慙亦未至始素終元如絲之改色也

同上

徐悱敬業酬到溉詩云寄言封侯者數奇良可歎數音
所具反奇音居宜反按前漢書李廣傳曰大將軍衛青
陰受上指以爲李廣數奇毋令當單于恐不得所欲孟

康曰奇隻不偶也如淳曰數爲何奴所敗詳史所載若以數字爲去聲則是運數不偶耳豈有天子於將帥以命運敕之耶當從如說音爲所角反

同上

鮑明遠擬古云兩說窮舌端五車摧筆鋒劉良以兩說爲本末之說言舌端能摧折文士之筆端非也兩說者兩可之說也謂兩可之說能窮舌端而五車之讀能摧筆鋒摧者猶言脫千兔之毫者也李善又以魯連說新垣衍及下聊城爲兩說則益疎矣

同上

杜子美秋雨歎云闌風伏雨秋紛紛或者謂闌風二之無出處偶讀文選詩謝靈運初發都云述職期闌暑理

棹變金素翰曰闌暑夏末暑闌也闌風常用此語謂熏風闌盡將變而爲涼風也一本闌作蘭古字通用同上堂北曰背堂南曰襟故陸士衡詩曰焉得忘憂草言樹背與襟言前後皆樹庶冀其忘也

謝氏詩源

王充論衡云堯時五十民擊壤於塗不知壤爲何物後見李善注文選引風土記云壤以木爲之前廣後銳長四尺三寸其形如履將戲先側一壤於地遙於三四步以手中壤擊之中者爲上太平御覽亦載此事但御覽云長尺三四寸與文選注小異恐是書寫者誤以四字置尺字上蓋其形如履使長四尺三寸則不復有履

形矣當以御覽所載爲是

雲谷雜記

文選編李陵蘇武詩凡七篇人多疑俯觀江漢流之語以爲蘇武在長安所作何爲乃及江漢東坡云皆後人所擬也余觀李詩云獨有盈觴酒與子結綢繆盈字正惠帝諱漢法觸諱者有罪不應陵敢用之知坡公之言爲可信也

容齋題跋

詩文當有所本若用古人語意別出機杼曲而暢之自足以傳示來世左太沖詠史詩曰鬱鬱澗底松離離山上苗以彼徑寸莖蔭此百尺條世胄躡高位英俊沈下僚地勢使之然由來非一朝白樂天續古一篇全用之

日雨露長纖草山苗高入雲風雪折勁木澗松摧爲薪
風摧此何意雨長彼何因百尺澗底死寸莖山上春語
意皆出太沖然其含蓄頓挫則不逮也

容齋續筆

張平子四愁詩云美人贈我金錯刀何以報之英瓊瑤
金錯刀王莽所鑄錢名以黃金錯其文曰一刀直五千
或注引續漢書佩刀諸侯王以金錯環恐與王莽鑄錢
又別

藝苑雌黃

李善注文選本末詳備極可喜所謂五臣者眞俚儒之
荒陋者也而世以爲勝善亦謬矣謝朓張子房詩云苛
慝暴三殤此禮所謂上中下三殤言暴秦無道戮及于

稚子也而乃引苛政猛於虎吾父吾子吾夫皆死於是
謂夫與父皆殤豈非俚儒之荒陋者乎如此類甚多不
足言也

東坡志林

謝惠連屯雲蔽會嶺驚風涌飛流零雨潤墳澤落雪洒
林邱浮氛晦崖巘積素惑原疇曲汜薄停旅通川絕行
舟連四韵句法皆相似古詩正不當以此拘也

對牀夜話

陶靖節之讀山海經猶屈子之賦遠遊也精衛銜微木
將以填滄海刑天舞干戚猛志故常在悲痛之深可爲
流涕

困學紀聞

古詩十九首或云枚乘疑不能明也驅馬上東門遊戲

宛與洛辭兼東都非盡是乘作文心雕龍云孤竹一篇

傅毅之辭

若璩案玉臺新詠以西北有高樓東城高且長行行重行行涉江采芙蓉青青河畔草庭

中有奇樹迢迢牽牛星明月何皎皎八首爲枚作餘爲古詩

同上

古詩十九首有云冉冉孤生竹結根太山阿與君爲新

婚兔絲附女蘿兔絲生有時夫婦會有宜千里遠結婚

悠悠隔山陂思君令人老軒車來何遲言妻之於夫猶

竹根之於山阿兔絲之與女蘿也豈容使之獨處而久

思乎詩云葛生蒙楚蔭蔓于野予美亡此誰與獨處同

此怨也又涉江采芙蓉蘭澤生芳草采之欲遺誰所思

在遠道又庭中有奇樹綠葉發華滋攀條折其榮將以
遺所思馨香盈懷袖路遠莫致之亦猶詩人籊籊竹竿
以釣于淇豈不爾思遠莫致之之詞第反其義耳前輩
謂古詩十九首可與三百篇並驅者亦此類也

對牀夜話

詩曰山有漆隰有栗子有酒食何不日鼓瑟且以喜樂
且以永日宛其死矣他人入室悲其君有酒食鼓瑟之
不能樂猶有國而弗治則將爲他人之所有也曹子建
樂府云置酒高殿上親友從我遊秦箏何慷慨齊瑟和
且柔主稱千金壽賓奉萬年酬盛時不可再百年忽我

適生存華堂處零落歸山邱有詩人爲樂之意而無其
譏又詩曰蟋蟀在堂歲聿云暮今我不樂日月其除無
已太康職思其居好樂無荒良士瞿瞿旣欲其樂又慮
其荒此詩人憂深思遠之意陸士衡云來日苦短去日
苦長今我不樂蟋蟀在房我酒旣旨我殽旣臧短歌可
詠長夜無荒全是詩人之體

同上

七哀詩子建云君行踰十年賤妾常獨棲怨游子之未
返也王仲宣云路有饑婦人抱子棄草間歎時世之喪
亂也又方舟泝大江日暮愁我心感羈旅之多憂也張
孟陽云毀壤過一坏便房啟幽戶傷漢陵之發掘也又

白露中夜結木落何條森慨秋氣之可悲也哀之雖同而意各異初不解七哀義或謂病而哀義而哀感而哀悲而哀耳目聞見而哀口歎而哀酸鼻而哀所哀雖一事而七者具也同上

子建公譙詩云清夜遊西園飛蓋相追隨明月澄清景列宿正參差秋蘭被長坂朱華冒淥池潛魚躍清波好鳥鳴高枝讀之猶想見其景也是時劉公幹王仲宣亦有詩劉云月出照園中珍木鬱蒼蒼清川過石渠流波爲魚防芙蓉散其華蒨萑溢金塘雲鳥宿水裔仁獸遊飛梁王云涼風撤蒸暑清雲卻炎暉高坐君子堂竝坐

蔭華懷嘉穀充圓方旨酒盈金罍管絃發徽音曲度清
且悲皆直寫其事今人雖畢力竭思不能到也 同上

魏文帝西北有浮雲亭亭似車蓋惜哉時不遇適與飄
風會吹我東南行南行至吳會吳會非我鄉安能久留
滯棄置勿復陳客子常畏人又子建轉蓬離木根飄飄
隨長風何意迴颺舉吹我入雲中高高上無極天路安
可窮類此遊客子捐軀遠從戎毛褐不掩形藜藿常不
充去去莫復道沈憂令人老此結句換韵之始 同上

古塘上曲有云莫以賢豪故棄捐素所愛莫以魚肉賤
棄捐慈與薤莫以桑麻賤棄捐管與蒹前云衆口鑠黃

金使君生別離或謂甄后爲郭后所譖遂作此觀其辭
殆亦是也陸士衡云男懼智傾愚女愛衰避妍不惜微
軀退惟懼蒼蠅前願君廣末光照妾薄暮年則爲甄后
作無疑矣劉休元擬古云願垂薄暮景照妾桑榆時適
與士衡末句同

同上

詩云昔我往矣楊柳依依今我來思雨雪霏霏東坡謂
韓退之始去杏飛蜂及歸柳嘶蜚與詩意同子建云昔
我初遷朱華未希今我旋止素雪云飛又始出嚴霜結
今來白露晞王正長云昔往倉庚鳴今來蟋蟀吟顏延
年云昔辭秋未素今也歲載華退之又居其後也

同上

子建詩朱華冒綠池古人雖不于字面上著工然冒字
殆妙陸士衡云飛閣縵虹帶層臺冒雲冠潘安仁云川
氣冒山嶺驚湍激巖阿顏延年云松風遵路急山煙冒
壠生江文通云涼葉照沙嶼秋華冒水潯謝靈運云蘋
萍泛沈深菰蒲冒清淺皆祖子建

同上

張平子詩云我聞其聲載坐載起王仲宣云我思弗及
載坐載起劉公幹云思子沉心曲長歎不能言起坐失
次第一日三四遷懷人之意盡於此矣

同上

左太冲詠史云濟濟京城內赫赫王侯居冠蓋蔭四術
朱輪竟長衢朝集金張館暮宿許史廬南隣擊鐘磬北

里吹笙竽寂寂楊子宅門無卿相興鮑明遠詠史云京
城十二衢飛薨各鱗次仕子影華纓遊客竦輕轡明星
晨未稀軒蓋已雲至賓御紛颯沓鞍馬光照地君平獨
寂寞身世兩相棄江文通詠史亦云金張服貂冕許史
乘華軒王侯貴片議公卿重一言太平多歡娛飛蓋東
都門顧念張仲蔚蓬蒿滿中園三詩一軌也

同上

靈運詩初篁苞綠籜新蒲含紫茸邱希範詩巢空初鳥
飛荇亂新魚戲綽有流麗之風視小謝魚戲新荷動鳥
亂餘花落之句亦無媿

同上

一身事關西家族滿山東二年從車駕齋祭甘泉宮三

朝國慶畢休休至舊邦四牡曜長路輕葢若飛鴻五侯
相餞送高會集新豐六樂陳廣坐組帳揚春風七盤起
長袖庭下列歌鍾八珍盈彫俎綺肴紛錯重九族共瞻
遲賓友仰徽容十載學無就善宦一朝通鮑明遠數詩
也卦名人名及建除等體世多有之獨無以此爲戲者
同上

韓非子曰六國時張敏與高惠二人爲友每相思不能
得見敏便於夢中往求之但行至中途卽迷不知路沈
休文云神交疲夢寐路遠隔思存又夢中不識路何以
慰相思用前事也古詞云遠道不可思夙昔夢見之又

獨宿累長夜夢想見容輝皆沿韓非之微意而變之耳
同上

陸士衡吳趨行云楚妃且勿歎齊娥且莫謳四坐竝清
聽聽我歌吳趨吳趨自有始請從閭門起謝靈運會吟
行云六引綏清唱三調佇繁音列筵皆靜寂咸共聆會
吟會吟自有初請從文命敷盡踵其步驟同上

蘇子卿詩俯觀江漢流仰視浮雲翔魏文帝云俯視清
水波仰看明月光曹子建云俯降千仞仰登天阻何敬
祖云仰視垣上草俯察階下露又俯臨清泉淵仰觀嘉
木敷謝靈運云俯濯石下潭仰看條上猿又俯視喬木

杪仰聆大壑淙辭意一也古人句法極多有相襲者如
前所議日暮碧雲合及朝遊江北岸之類皆是若嵇叔
夜目送歸鴻手揮五絃俯仰自得遊心太元則運思寫
心迥不同矣

同上

高適詩二月猶北風天陰雪冥冥寥落一室中悵然慙
百齡苦愁正如此門柳復青青皇甫冉云岸有經霜草
林有故年枝俱應待春色獨使客心悲不如適氣長而
有生意淵明歸去來辭云木欣欣以向榮泉涓涓而始
流善萬物之得時感吾生之行休冉述之也

同上

阮嗣宗詠懷云開軒臨四野登高望所思邱墓蔽山阿

萬代同一時千秋萬歲後榮名安所之可謂混貴賤之
殊盡死生之變老杜云王侯與螻蟻同盡隨邱墟則簡
而妙矣又劉越石荅盧諶云何以贈子竭心公朝老杜
送嚴武云公若登台輔臨危莫愛身鮑昭東武吟云將
軍旣下世部曲亦罕存老杜嚴僕射云素幔隨流水歸
舟返舊京老親如宿昔部曲異平生善用古者自不同
若丈人試靜聽賤子請具稱則又用鮑明遠主人且勿
喧賤子歌一言之句又身輕一鳥過亦用張景陽詩張
詩云人生瀛海內忽如鳥過目

同上

選詩叢話

畢